

**REGISTRATION OF  
BIRTHS & DEATHS  
CHUNGCHANGA HRIATTUR  
PAWIMAWH TE**

**2022**

**Issued by Directorate of Economics & Statistics,  
Mizoram**

**REGISTRATION OF BIRTHS & DEATHS CHUNGCHANGA HRIATTUR**

Registration of Births & Deaths Act, 1969 chuan piang emaw, thi emaw an awm chuan dan anga chhinchhiah tir (Register) vek turin India khua leh tui zawng zawng te a phut tlat a a ni. Pian leh Thih chhinchhiah (Register) a nih rual hian Birth Certificate/Death Certificate pekchhuah nghal zel tur a ni.

**A BIRTH REGISTER/BIRTH CERTIFICATE CHUNGCHANG****I BIRTH REGISTER DAN / BIRTH CERTIFICATE SIAM DAN**

1. Pian atanga ni 21 chhungin Pianna hmun RBD hnenah report-in (Chhinchhiah/Register tirin) Birth Certificate lak nghal theih a ni a, man chawi a ngai lo.
2. Pian atanga ni 22-30 chhunga Pianna hmun RBD hnenah report-in (Chhinchhiah/Register tirin) Certificate a lak nghal theih a, late fee Rs.10/- leh Certificate man Rs 100/- (Total Rs 110/-) chawi a ngai.
3. Pian atanga ni 31-365 chhung hian **Thuneitu\*** hnenah Permission la-in register theih a ni a, late fee Rs.100/- leh Certificate man Rs.100/- Application form man Rs 20/- (Total Rs 220/-) chawi a ngai. **Thuneitu\*** tih hi hetiang hi an ni : AMC huam chhung tan AMC Office, Aizawl District hmun dang tan Directorate of Economics & Statistics, District dang tan mahni District-a Economics & Statistics Office (ADR/DRO) theuh.
4. Pian atanga kum khat chin chu **Delayed Birth Registration** [SI No A(V)] a hnuai sawi angin tih tur a ni.

**Note : Hospital-a nau piang tan RBD tih hi Hospital kha a ni nghal, Hospital a nau piang chuan lo register zel avangin a hranpa-in mahni vengchhung RBD hnenah in Register a ngai tawh lo.**

**II DIGITIZED BIRTH CERTIFICATE CHUNGCHANG :**

1. Kum 2022 October thla atang chuan Economics & Statistics Office atanga Birth & Death Certificate pekchhuah chu (Digitized /Computerised) Certificate vek a ni tawh a, Digitized Certificate ah hian facsimile signature of issuing authority chuanna QR Code leh Bar Code a awm vek a, RBD signature leh seal a ngai tawh lo. Hei hi India ram pumah pawm vek turin Govt. of India (Ministry of Home Affairs) chuan thu a chhuah tawh a ni. (vide Circular No. 1/12/2014-VS(CRS) dated 27<sup>th</sup> July, 2015)
2. Birth Certificate nei tawh sa tan a hnuai sawi hmunah te hian (Digitized /Computerised) Birth Certificate dil theih a ni. Search Fee Rs 100/-, Certificate man Rs 100/-, Application Form man Rs 20/- (Total Rs 220/-) chawi a ngai.

A. Aizawl District tan Directorate of Economics & Statistics

B. District dang zawng chu mahni pianna District Economics & Statistics Office (ADR/DRO)

3. Birth Certificate la nei miah lo chuan a hnuai Delayed Birth Registration dil dan angin dil phawt a, Certificate lakchhuah hunah Digitized Certificate pek chhuah a ni ang.

### III CERTIFICATE A HMING SIAM THAT / ZIAH BELH CHUNGCHANG :

1. Birth Registration/Birth Certificate nei tawh sa-in, a hming siamthat / sap hming / hnam hming /belh/Paih etc. a duh chuan a duh ang taka hming ziah tawhna documents attested copy thehlutin siam that sak theih a ni a. Original Birth Certificate erawh an surrender ngei ngei tur a ni. Search Fee Rs 100/-, Certificate man Rs 100/-, Application Form man Rs 20/- (Total Rs 220/-) chawi a ngai. Nu leh pa hming siamthat ngai pawh hetiang tho hian kalpui theih a ni. Hming siamthat hi an put zui ngei tur chauh siam that tur a ni.
2. Hming put sa atanga hming dang daiha thlak tur a nih chuan “Deed of Change of Name” Judicial Magistrate 1<sup>st</sup> Class hnen atanga an lak phawt hnuah siam that sak theih a ni a. Original Birth Certificate surrender ngei tur a ni. **Nu leh pa hming chu midang hmingin a thlak theih loh.**

**Note :** Original Birth Certificate surrender tur nei lo chuan an ti bo/an nei tawh lo ngei tih Police hriatpuina (Police Report) an thil tel a ngai.

### IV RE-ISSUANCE OF BIRTH CERTIFICATE :

1. Birth Certificate tibo/ti chhia/copy dang duh belh te chu office record-a mi ang thlapin pek chhuah leh theih an ni a. Search Fee Rs. 100/-, Certificate man Rs.100/- leh Application Form Rs 20/- (Total Rs 220/-) chawi a ngai.

### V DELAYED REGISTRATION OF BIRTH CHUNGCHANG :

1. Pian atanga kum khat (ni 365) chhunga in register hman lo tan mahni pianna District DC Office atangin Delayed Registration dilna form lakchhuah tur a ni. (DC te hi an district chhunga District Registrar of Births & Deaths an ni)
2. Form chu dik taka fill up hnu-ah document thil tel ngai te thil tel vekin pianna hmun Registrar of Births & Deaths (RBD) hnenah kalpui tur a ni a, RBD hian form fill up dan a dik leh dik loh te, documents a kim leh kim loh te a check hnu-ah dilpui tlak nia a ngaih chuan Dilpuina (Recommendation) a lo sign sak ang.
3. Documents thil tel tur te :
  - (i) Passport size thlalak pahnih
  - (ii) Vengchung mi leh sa ngei a ni tih hriatpuina lehkha Local/Village Council atang leh YMA/YLA/YCA/MTP atangin copy hnih
  - (iii) Diltu hi kum tling tawh a nih chuan Voter ID. Kum tling lo (Voter ID nei lo) tan Nu emaw, Pa emaw Voter ID - Attested Photo copy pahnih
  - (iv) Diltu pian ni, thla leh kum a dik ngei tih chian nan a hnuai document-te zinga engemaw ber hi thil tel tur a ni (Attested photo copy pahnih)

(a) Sawrkar hnathawk tan Service Book-a date of birth lanna pherk hman tur a ni.

(b) 1<sup>st</sup> July 1985 hma lama piang tan date of birth lanna - Educational Certificate (Board) emaw, Baptisma Cetificate emaw, Nau hlanna Certificate emaw, Vaccination Card (Mother & Child Protection Card) emaw, Kohhran/Sakhaw record bu-a an date of birth lanna photocopy, Kohhran Secretary/Sakhaw Puithiamin hming a ziah hnan.

(c) 1<sup>st</sup> July 1985 hnu lama piang tan date of birth lanna - Baptisma Certificate emaw, Nau hlanna Certificate emaw, Vaccination Card (Mother & Child Protection Card) emaw, Kohhran/Sakhaw record bu-a an date of birth lanna photocopy, Kohhran Secretary/Sakhaw Puithiamin hming a ziah hnan.

4. Form fill up dan a dik leh dik loh te, documents a kim em tih te vengchhung RBD-in a check hnuah dilpui tlak nia a ngaih chuan Recommendation a hnuai mi hi a lo sign ang. Chumi hnuah ADR/DRO, Economics & Statistics Office-ah thehluh tur a ni. Aizawl District bik chu Directorate of Economics & Statistics-ah thehluh tur a ni. Office hian documents te chu ngun takin an lo check ang a, record-a a awm leh awm loh an lo check bawk ang a, Office in pek tlak ni a an ngaih chuan Non Availability Certificate (NAC) an lo pe chhuak ang. **Birth NAC hi a diltu ngei ADR/DRO office ah kal kher tur a ni a, (kum 60 chunglam leh Disabled Person te erawh chu ngaihnathiam theih an ni).** Application form Rs 20/-, Search Fee Rs 100/- leh NAC fee Rs 100/- Total Rs 220/- chawi a ngai.
5. Economics & Statistics Office atanga NAC (Non-Availability Certificate) lakchhuah hnuah DC Office-a Executive Magistrate hnenah kalpui leh tur a ni a, documents te ngun taka check leh a nih hnuah Executive Magistrate in pek tlak nia a ngaih chuan Delayed Registration Order a pe chhuak ang.
6. Executive Magistrate-in Delayed Registration Order a pek hnuah ADR/DRO, Economics & Statistics Office-ah, Aizawl District bik chu Directorate of Economics & Statistics-ah Delayed Registration hi tih tur a ni. Registration tih rual hian Birth Certificate pekchhuah nghal a ni ang. Delayed Registration Fee Rs 1000/- leh Certificate man Rs 100/- chawi a ngai.

## **B DEATH REGISTER/DEATH CERTIFICATE CHUNGCHANG**

### **I DEATH REGISTER DAN/DEATH CERTIFICATE SIAM DAN**

1. Thih atanga ni 21 chungin Pianna hmun RBD hnenah report-in (Chhinchhiah/Register tirin) Death Certificate lak nghal theih a ni a, man chawi a ngai lo.
2. Thih atanga ni 22-30 chungin Pianna hmun RBD hnenah report-in (Chhinchhiah/Register tirin) Certificate a lak nghal theih a, late fee Rs.10/- leh Certificate man Rs 100/- (Total Rs 110/-) chawi a ngai.
3. Thih atanga ni 31-365 chungin hian **Thuneitu\*** hnenah Permission la-in in register theih a ni a, late fee Rs.100/- leh Certificate man Rs.100/- Application form man Rs 20/- (Total Rs 220/-) chawi a ngai. **Thuneitu\*** tih hi hetiang hi an ni : AMC huam chung tan AMC Office,

Aizawl District hmun dang tan Directorate of Economics & Statistics, District dang tan an mahni District-a Economics & Statistics Office theuh.

4. Thih atanga kum khat hnu lam chu **Delayed Registration** [SI No. B- (IV)] a hnuai sawi angin tih tur a ni

**Note : Hospital-a thi tan RBD tih hi Hospital kha a ni nghal a, Hospital in Death Certificate an pe thei vek a, hmun dang atanga lak tur a ni lo. An thih atanga kum 2 a liam tawh erawh chuan a chung a sl no. 3-a sawi Thuneitu\* office atang khian lak a ngai thung**

## II CERTIFICATE A HMING SIAM THAT CHUNGCHANG :

1. Death Certificate a hming siamthat ngai a awm chuan siamthat duh dan ang taka hming ziah tawhna documents attested copy thehlutin siam that sak theih a ni a. Original Death Certificate erawh an surrender ngei ngei tur a ni. Search Fee Rs 100/-, Certificate man Rs 100/-, Application Form man Rs 20/- (Total Rs 220/-) chawi a ngai. Nu leh pa hming siamthat ngai pawh hetiang tho hian kalpui theih a ni.
2. Office record-a awm tawh sa mitthi nupui/pasal hming chu midang hmingin thlak ngawt theih a ni lo va, **Mitthi nupui/pasal chu chumi chu a ni e tih Court Order a awm chauhin thlak theih a ni.**

**Note :** Original Death Certificate surrender tur nei lo chuan an ti bo/an nei tawh lo ngei tih Police hriatpuina (Police Report) an thil tel a ngai.

## III RE-ISSUANCE OF DEATH CERTIFICATE :

1. Death Certificate nei tawh, tibo/ti chhia/copy dang duh belh te chu office record-a mi ang thlapin pek chhuah leh theih an ni a. Search Fee Rs. 100/-, Certificate man Rs.100/- leh Application Form Rs 20/- (Total Rs 220/-) chawi a ngai.

## IV DELAYED REGISTRATION OF DEATH CHUNGCHANG :

1. Thih atanga kum khat (ni 365) chhunga in register hman lo tan an thihna hmun District DC Office atangin Delayed Registration dilna form lakchhuah tur a ni. (DC te hi an district chhunga District Registrar of Births & Deaths an ni)
2. Form chu dik taka fill up hnu-ah document thil tel ngai te thil tel vekin thihna hmun Registrar of Births & Deaths (RBD) hnenah kalpui tur a ni a, RBD hian form fill up chu a dik leh dik loh te, documents a kim leh kim loh a check hnu-ah ADR/DRO hnenah a dilpui ang.
3. Documents thil tel tur te :
  - (i) YMA/YLA/YCA/MTP atangin an thih thu leh thih hun hriatpuina copy hnih
  - (ii) Mitthi hming leh thihni lanna board thlalak emaw, Lungphun-a hming leh thih ni Chiang taka lanna thlalak copy hnih
  - (iii) Sar thi (unnatural death) bikah a chung a thlalak nei thei lo tan an thih chungchang inziahna extract of Police Station General Diary Entry, attested copy hnih

4. Form fill up dan a dik leh dik loh te, documents a kim em tih te vengchhung RBD-in a check hnuah dilpui tlak nia a ngaih chuan Recommendation a hnuai mi hi a lo sign ang. Chumi hnuah ADR/DRO, Economics & Statistics Office-ah thehluh tur a ni. Aizawl District bik chu Directorate of Economics & Statistics-ah thehluh tur a ni. Office hian documents te chu ngun takin an lo check ang a, record-a a awm leh awm loh an lo check bawk ang a, Office in pek tlak ni a an ngaih chuan Non Availability Certificate (NAC) an lo pe chhuak ang. Application form Rs 20/-, Search Fee Rs 100/- leh NAC fee Rs 100/- Total Rs 220/- chawi a ngai.
5. Economics & Statistics Office atanga NAC (Non-Availability Certificate) lakchhuah hnuah DC Office-a Executive Magistrate hnenah kalpui leh tur a ni a, documents te ngun taka check leh a nih hnuah Executive Magistrate in pek tlak nia a ngaih chuan Delayed Registration Order a pe chhuak ang.
6. Executive Magistrate-in Delayed Registration Order a pek hnuah ADR/DRO, Economics & Statistics Office-ah, Aizawl District bik chu Directorate of Economics & Statistics-ah Delayed Registration hi tih tur a ni. Registration tih rual hian Death Certificate pekchhuah nghal a ni ang. Delayed Registration Fee Rs 1000/- leh Certificate man Rs 100/- chawi a ngai.

## C REGISTRAR OF BIRTHS & DEATHS (RBD) HRIATTUR

### I REGISTRATION CHUNGCHANG

1. Kan thuneihna huam chhunga Piang leh Thi reng reng kim taka Register hi kan tihtur leh mawhphurhna a ni. Piang leh Thi chhungten rawn report nachang an hriat loh pawhin bengvar chhuaha tihdan hrih hriat hram hram thin tur a ni.
2. Piang leh thi rawn report an awm reng rengin hetiang hian tih thin tur a ni :
  - (i) Birth/Death Register a ziahluh – Dik leh felfai taka ziahluh tur a ni a, column zawng zawng fill up ngei tur a ni. A theih chuan hawrawpui (Capital Letter) in Birth/Death Register-ah chuan ziahluh tur a ni.
  - (ii) Report petu chu Birth/Death Report Form fill up tir tur a ni a, uluk taka enpuiin, column zawng zawng an fill up kimin a dik ngei tih enchian hnuah chauh hming sign hnan tur a ni. **Report form-ah hian naute nu leh pa phone number, mitthi-ah chuan report petu phone number ziah lan zel tur a ni** (Anmahni zawhna zawt chung zela fill up sak pawh finthlak awm e)  
**Birth Report form-ah leh Birth Register-ah naute hming ziah ngei tum tur a ni. Nameless record neih loh hram tum tur a ni.**
  - (iii) A chung a thil pahnih tih hnuah chauh Birth/Death Certificate ziah sak thin tur a ni. Certificate hi uluk tak leh dik taka ziah hnuah hologram bel chauh tur a ni a, Seal chhut theihngilh loh tur
3. RBD te hian nangmahniin Bound Register-ah emaw, in thuhneihna huam chhunga birth leh death record tha takin lo vawng ve theuh thei ula duhthusam a ni. Hei erawh hi chu Office

ah thehluh a ngai lova, RBD ten in kawl that tur leh midang inthlak a tul hunah pawh inhlan chhawn zel atan thil tha tak a ni ang.

## II CERTIFICATE RE-ISSUE CHUNGCHANG :

1. Birth / Death Register RBD ten an kawl lai (kum liam chiah leh kum kallai, kum hnih) chhunga miten Certificate Re-issue an duh chuan, Certificate man Rs. 100 lain Section 17 angin Certificate Re-Issue tur a ni. (Hospital RBD chuan Certificate man Rs 100 leh Search Fee Rs 100, total Rs 200 lak tur a ni). Re-issue hian Receipt pek zel tur a ni a, Receipt Counterfoil chu tha taka vawngin kum tawpah pawisa nen Office-ah thehluh thin tur a ni.
2. RBD ten Register an kawl lai anih chuan an register tawh ten an Certificate-a hming siamthat – Hnam hming/Sap Hming belh emaw, paih emaw, hming lamtawi, lampum an phalsak thei a, chutianga hming siamthat phalsak reng reng chuan an Certificate Original an thehluh ngei ngei a ngai a, Birth/Death Register-ah hming chu an duhdan ang taka siamthat phawt hnuin Section 17 angin Certificate pekchhuah leh tur a ni. Fee chu a chungsa sawi (SI No 1) ang khian lak tur a ni.

**Note : Hming siamthat tih hian hming dang daih a theih loh va, nu leh pa hming midang hminga thlak sak phei chu tih loh tawp tur a ni.**

## III ADOPTION CHUNGCHANG :

1. Miin Sawrkar Dan ang thlapa Adoption an tih chuan, Adoption Order certified copy an rawn thehluh ang a, chumi ang chuan Birth Register-ah Nu leh Pa hming lo siam that sak chauh tur a ni.
2. Registration number te, registration date te, date of birth, place of birth te a pangngai vek hman tur a ni a, naute hming (a tul chuan), leh nu leh pa hming chauh siamthat tur a ni.
3. Birth Certificate pekchhuah tawh Original an rawn thehluh ngei ngei tur a ni a, a tharin Birth Certificate siamsak tur a ni a, an Certificate ah chuan nu leh pa dik tak anga ziah tur a ni. Birth Certificate ah falak (adoptive child) a ni tih a lang tur a ni lo.
4. Birth Register-ah birth record a tharin ziah tur a ni lo va, record awm tawh sa kha a tul angin naute hming leh nu leh pa hming te siamthat mai tur a ni a, Remarks column ah adoption avangin siamthat a nih thu ziah tur a ni
5. Form 1A, (Falak/Adoption Form) dik takin adoptive parent te fill up tir tur a ni. (Adoption Order-a nu leh pa hming inziak ang thlapin ziah tur a ni). Hei hi Monthly Report thehluh hunah report dang rualin thehluh ve mai tur a ni.
6. Falak (Adoptive Child) hi la register miah loh a nih a (birth certificate la nei lo), ni 21 a la tlin loh bawh chuan, Register ah naupiang thar anga ziahluh mai tur a ni a. Ni 21 aia upa a nih chuan a upat dan azirin Late/Delayed Registration angin kalpui tur a ni ang. Nu leh pa hmingah adoptive parents te ziah mai tur a ni, Report Form ah erawh chuan Form 1A hman tur a ni.

**IV REPORT THEHLUH CHUNGCHANG :**

1. WhatsApp hmangin thla thar veleh report thawn thin tur a ni. Hetiangin :  
Birth – Male – Female –  
Death – Male – Female –  
Still Birth – Male – Female –  
Nil anih pawhin Nil Report thawn ngei ngei tho tur a ni.

Hemi Report hi office lamin an lo khaikhawm a, Registrar General of India (RGI) office ah an thawn ziah a ni. Tin, he Report hi Supreme Court of India thupek angin Economics & Statistics Department Website-ah tarlan zel a ni bawk.

2. Birth, Death, Still Birth Report Form te leh Summary Report te hi thla thar veleh, ni 5 aia tlai lovah thawn ngei ngei tur a ni.
3. Medical Certification of Cause of Death (MCCD) chungchangah RBD thuneihna huam chung, Damdawiin ni lova thi an awmin Form 4A hmangin MCCD Report neih hram tum tur a ni. MCCD Report bik hi report dang ruala thawn ve hman a nih loh chuan a thla leh (next month) report ah thawn tel mai tur a ni.

**V REGISTER VAWN DAN**

1. Birth leh Death Register te hi kum khat, (January – December) chung zel atan hman tur a ni. January ni khat atangin Register bu thar hman zel tur a ni a, a bu thar hman hian SI. No pawh 1 atangin tan leh zel tur a ni. Kumhlui lam SI No chhonzawm loh tur.
2. Register hi RBD ten kum kal lai leh a hma chiah kum an kawl ang a, chumi hmalam chu office ah an thehlut zel tur a ni. Entirnan kum 2022 ah chuan RBD ten Register Bu 2022 leh a hma chiah kum 2021 bu an kawl ang a, 2020 leh a hma lam Register chu office ah thehlut vek tur a ni.
3. Bound Register-ah RBD ten mahni khua/veng chung birth leh death record in vawng anih chuan hei hi chu office ah thehluk a ngai lova, nangmahni record atan leh registration tih nawn a awm loh nana invenna tha tak a ni.

**VI THIL PAWIMAWH DANG :**

1. Delayed Registration (Birth & Death) dilna reng reng hi RBD ten dilpuina (Recommendation) rawn sign sak zel a ngai a, RBD ten an recommend loh chuan office ah dilna hi lo reject zel a ni. Hetah hian dilna form an fill up dan a dik em tih te, documents thil tel ngai an thil kim vek em tih te, RBD ten ngun taka an check hnuah chauh dilpuina hi lo sign thin tur a ni.
2. Certificate re-issue (Birth & Death) chungchang – RBD Act 1969 Section 17 leh RBD Rules 2007 rule 13(4) in a sawi angin, mi tu pawhin fee tul ang zat an pek phawt chuan Birth leh Death Certificate te hi re-issue theih a ti a. Tunhmaa Death Certificate re-issue diltu leh mitthi inlaichinna document thil tel ngai tih thin kha a tul chhonzawm tawh lem lo. Register-a record tawh erawh tih danglam loh tur a ni.



3. Birth and Death Record te hi office a lo thlen hian digitized zel a ni tawh a, chuta thil lang Chiang ta deuh chu – Hospital-a piang, Hospital in an register tawh hnu engemaw zat chu RBD ten an lo register leh tih a lang a. Hei hi tih loh tur a ni. Hospital a piang leh thi reng reng chu Hospital RBD in an lo register zel avangin hmun danga lo register tawh loh tur a ni. Local RBD te hnena certificate an rawn dil a nih pawhin an pianna/thihna Hospital-ah Certificate la chhuak tura tirh zel tur a ni.
4. Tunhma deuh khan RBD thenkhat hian Register-a ziaak lut si lovin Birth Certificate an lo pe chhuak thin niin a lang a, hetiang hi tih loh tawp tur a ni. Tunlaih Digitized Certificate kan hmang uar chho zel dawn niin a lang a, Register-a ziahluh loh chu Certificate pawh nei se a valid dawn chuang lo va, buaina zakhua thlentu mai mai a ni dawn. Chutih lain kan thuneihna huam chungah Hospital thar a ding a nih chuan (Registration Unit la ni lo) chuta piang leh thi reng reng RBD ten an register tur a ni a, Hospital thuneitute leh RBD te thawhho a ngai thung.
5. **RBD Act 1969 dan section 23 angin RBD ten an thuneihna huamchungah birth leh death an register duh lo anih chuan hrem theih an ni a, tin, monthly report an pe lo a nih chuan hrem theih an ni bawk.** Kan report te hi RGI office lamah thawn chhawn zel a ni a, tin, kan report tar chhuah dan turah pawh Supreme Court hial-in direction a rawn nei ta zel bawk nen, RBD ten inthlahdah lovin tan i la thar sauh sauh ang u.
6. **Registrar of Births & Deaths (RBD) te hi an veng/khua theuhva mi rinawm leh rintlak nia Sawrkarin a ngaih, Sawrkar Notification siam meuhva a ruat te kan ni a. Chuvangin dik tak leh felfai takin, rinawm leh thahnemngai takin, Mizoram leh mipuite tan taima taka thawk zel turin kan in ngen thar leh a ni.**

#### D FREQUENTLY ASK QUESTIONS (FAQ)

1. Birth / Death Certificate siam nan hian pawisa engzat nge sen ngai?

Chhanna : A hun tak (ni 21 chung)-a pian leh thih report chuan, Birth/Death Certificate hi a thlawn vek a ni. Ni 22 – 30 inkara report chuan Late Fee Rs 10. Ni 31 – 365 inkar Late Fee Rs 100 ni a, kum khat a pelh tawh erawh chuan Late Fee (Delayed Registration Fee) Rs 1000 chawi a ngai tawh thung.

2. Kan pian hun lain in report na tur RBD an awm si lova, chuvangin awlsam zawk leh tlawm zawkin Birth Certificate min siam sak thei lawm ni?

Chhanna : Birth / Death Registration hi Mizoramah 1<sup>st</sup> July 1985 atangin tih tan a ni a, chutatang chuan kum 2017 thleng (kum 32 chung) awlsam deuh tak leh pawisa pawh cheng sawmhnih khat lek sengin Registration tih theih a ni. Awlsam zawk leh tlawm deuha Registration tih avang khan mi tam takin diklo takin Birth Certificate an siamtir tih hriat a ni a, chuvangin Sawrkarin Registration tih dan tur ruahmanna thar a siam ta a ni. Dan ang bakin tumah Birth leh Death Registration a tih theih loh.

3. Birth/Death Certificate kan ti bo va, a thar la leh turin engtia tih tur nge?

Chhanna : Pianna/Thihna District-a Economics & Statistics (DRO) Office-ah dilna form awmsa hmangin re-issue dil leh mai tur a ni. Office-a Birth/Death record ang chiaha lak tur a nih chuan, engmah document thil tel ngai a awm lo.

4. Ka Birth Certificate ah hian hnam hming ka telh lo va, ka document dang zawngah ka telh bawk si a, Birth Certificate hi a siamthat theih em?

Chhanna : Theih e, document-a hnam hming telhna attested copy leh Birth Certificate original kengin mahni pianna District Economics & Statistics (DRO) Office-ah siamthat dil theih a ni. Birth Certificate original tihbo tawh a nih chuan, tih bo ngei a ni tih Police Report thehluh tel a ngai.

5. Ka Birth Certificate ah hian kan date of birth dik tak ziah a ni a, mahse ka Matric Certificate leh document dang nen hian a in mil lova, ka document dangte nen in ang turin Birth Certificate hi a siamthat theih em?

Chhanna : Theih loh, Birth Certificate ami angin document dang chu siam that zawk mai tur a ni.

6. Ka tet lai atangin ka nu leh pa tak ni lo, tuna min enkawltu ka nu leh pa hian min enkawl a, ka birth certificate ah hian tuna min enkawltu ka nu leh pate hming hi ziah ka duh a, tihdan a awm em?

Chhanna : Birth Certificate a nu leh pa hming hi midang hmingin a thlak ngawt theih lo va, amaherawhchu Sawrkar dan ang thlapa Adoption tih a nih a, Adoption Order te a awm chuan, adoptive parents te chu nu leh pa anga ziakin Birth Certificate siamthat tur a ni.

7. Naute pa hming ziak lang lovin Birth Certificate siam theih a ni em?

Chhanna : Theih dan a awm, hmeichhe pasal nei lovin nau a hrin a, pa tel lovin a nu chauhin a enkawl ani tih Judicial Magistrate First Class hmaa siam affidavit a awm chuan, naute pa hming ziak lang lovin, single parent angin birth register theih a ni.

8. Naute hi a pa in a pawm tlat lo va, chuvangin Birth Certificate ah hian a pa hming aiah a pu hming ziah mai kan duh a, a theih em?

Chhanna : Naute pa hmingah midang hming ziah ngawt theih a ni lo. A pa atan a pu hming ziak tur chuan Sawrkar dan ang thlapa Adoption tih a ngai. Tin, a pa-in a pawm lo tih emaw, a nu chauhin a paiin a enkawl ngei a nih tih Judicial Magistrate First Class hmaa siam Affidavit te a awm chuan, a pa hming ziak lang lovin (single parent angin) birth register theih a ni bawk.

9. Ka pasal nen kan inthen tawh a, kan fate hi keimah chauhvin ka enkawl a, Supreme Court in min phalsak angin ka fate Birth Certificate-ah hian pa hming lang lovin, single parent angin siamthat leh vek ka duh a, a theih em?

Chhanna : Theih loh, Supreme Court chuan hmeichhe pasal nei lovin nau a neih a, amah chauhin a paiin a enkawl ngei tih affidavit a neih chuan, pa hming ziak lang kher lovin, single parent angin birth register theih a ti a. Supreme Court thupek hi Birth register vek tawh, duh duh huna pa hming thaichhiat tir leh nan hman theih a ni lo.

10. Ka pu death certificate hi kan la chhuak tawh a, amaherawhchu kan chhungte midangin an kawl tlat a, min pe duh bawk si lova, engtinng e ka tih ang?

Chhanna : A thihna district-a Economics & Statistics Office (ADR/DRO) ah Death Certificate re-issue dil theih a ni.

11. Ka pasal nen hian dan dik taka innei kan ni a, kan inthen laiin midang nen an inkawp a, chutih lai chuan a thi ta si a. A thih laia a kawppui chu a Death Certificate-ah a nupui angin ziah a ni a. Chuvangin a Death Certificate hi siamthain a nupui hmingah ka hming min ziah sak rawh u.

Chhanna : A nupui dik tak i ni ngei tih Court Order a awm phawt chuan a hmasa chu cancel in, Court Order ang thlap chuan Death Certificate chu siamthat theih a ni.

12. Kan naute hi a pian laiin engemaw avangin Birth Certificate-ah a pa hming aiah a pu hming kan ziak a, tunah a pa dik tak hming hi ziah kan duh leh si a, engtia tih tur nge?

Chhanna : Birth Certificate-a mi chu pa ni lovin a pu ngei a ni tih document rintlak- Naute nu Birth Certificate/EPIC/Aadhaar etc a awm theih a, tuna a pa anga in rawn sawi hi a pa dik tak a ni ngei tih Court Order a awm bawk chuan, siamthat theih a ni.

13. Sawrkar hna MR-in hun rei tak ka thawk tawh a, min regularise dawn hnai a, ka kum a over tawh avangin ka Birth Certificate ah hian ka kum min tih tlem sak thei em?

Chhanna : Thei lo, MR regularise tur chu Sawrkar pawhin an kum lam a ngaihnhathiam thei tho va, harsatna awm lo tura ngaih a ni.

14. Ka Birth Certificate-a ka kum leh ka Service Book-a ka kum a in ang lo va, Pension huna ka buai loh nan Service Book-a ka kum ang hian Birth Certificate min siamthat thei em?

Chhanna : Thei lo. Birth Certificate hi ziah sual palh te a nih loh chuan duh duha siam danglam theih a ni lo. Service Book-a pian kum ang chuan pension hun tur te an chhut ang a, harsatna a awm hran lo tura ngaih a ni.

15. Thingtlanga awm kan ni a, Aizawl Damdawiinah kan nau hi a thi a, Death Certificate hi kan veng RBD hnen atangin kan la mai thei em?

Chhana : Thei lo. Piang leh Thi hi an pianna leh thihna hmun ngei-ah chauh Birth leh Death Certificate hi pek tur a ni.

16. Ka naupan laiin Orphanage Home a enkawl ka ni a, ka Birth Certificate ah hian ka nu leh pa hmingah Home father leh mother ziah a ni a, ka nu leh pa dik tak hi ziah leh theih a ni em?

Chhanna : I nu leh pa dik tak an ni ngei tih Affidavit, Judicial Magistrate First Class hmaa siam i neih a, Orphanage Home lamin Home father leh mother hming an lo ziak ngei tih document i neih bawk a, Registering Authority in a pawm chuan, siamthat theih a ni e.

17. Mi bo emaw, tuitla emaw, an ruang hmuh si loh, an thi tawh ngei nia vantlang pawhin an ngaih te hi Death Certificate a siam theih em?

Chhanna : Indian Evidence Act dan angin an bo atanga kum 7 a liam hnuah, Court in an thi tih a declare chuan, Death Certificate siam theih a ni a, a hun chungchangah pawh Court in a declare ni kha an thih ni angin ziah mai tur a ni.

18. Hospital-a thi te hi Doctor-in an thih thu leh an thih chhan ziahna lehkha an pe thin tho si a, hei hi Death Certificate angin a pawm mai theih em?

Chhanna : Pawm mai theih loh. RBD Act 1969 leh RBD Rules anga Birth leh Death Certificate pekchhuah hi mi an piang ngei tih leh an thi ngei tih lam aian an pian leh thih kha Sawrkar dan anga Register (Chhinchhiah) ngei a ni tih lantirna a ni zawk a. RBD Act 1969 chuan piang leh thi reng reng hi Register (Chhinchhiah) vek turin a phut a, chuvangin India ramah chuan RBD Act leh Rules hnuah pekchhuah Birth leh Death Certificate te chauh hi Sawrkar chuan a pawm a ni.

Doctor ten thih chhan Certificate Form 4/4A hmanga an pek hi thil hran a ni a, Office lama kawl tur a ni. Mitthi chhungten mamawhna an neih erawh chuan office lamin a copy an pe ve thei.

19. India mi, India ram pawna piang leh thi hi engtingge Birth leh Death Certificate siam dan tur?

Chhanna : India mi, India ram pawna piang leh thi an awm chuan an awmna rama Indian Consulates ah Indian Citizenship Act angin an pian emaw thih emaw Register tur a ni a, hetiang Register tawh chu RBD Act hnuah Register ang tho a ngaih a ni.

Nau piang bikah chuan, a chungsa sawi anga Register loh pawhin, India rama naute a rawn haw atanga ni 60 chhungin RBD hnenah Birth Register tih theih a ni a, India rama piang angin Register mai tur a ni. Ni 60 a pelh tawh chuan Delayed Registration tihdan angin tih a ngai thung.

20. Kan chhungte Pian leh thih thu hi RBD te hnenah report ngei ngei a ngai em ni?

Chhanna : Ngai e. RBD Act 1969 chuan India rama piang leh thi zawng zawng hi chhinchhiah (Register) vek turin a ti a ni. Report duh lo chu hrem theih an ni.

21. Pian leh thih report hi tu mawhphurhna nge?

Chhanna : In-a piang emaw, thi emaw an nih chuan chhungkaw hotu ber mawhphurhna a ni a, hotu ber an awm hran lo a nih pawhin chhungkaw zinga upa ber mawhphurhna a ni. Chumi aiawh chuan midang pawhin RBD hnenah report an pe thei tho bawk.

Damdawiin emaw, Jail emaw, Hostel ang chi a piang leh thi an awm chuan RBD hnena report pek chu chu hmuna a hotu ber mawhphurhna a ni.

Report pe duh lo chu RBD Act 1969 section 23 hmangin pawisa chawitira hrem theih an ni.

22 Motor/Rel/Thlawhna kal laia thi te hi tu report tur nge?

Chhanna : Hetiang moving vehicle-a thi an awm chuan, mitthi chhungte chuang ve an awm chuan chumi chuan a thihna hmun bialtu RBD hnenah a report tur a ni. Mitthi chhungte chuang ve an awm loh chuan motor neitu/enkawltu mawhphurhna a ni.

Khaw kar kawng ramhnuaiia thi an nih chuan, khua an thlen hmasak ber khua a thi anga ngaih tur a ni a, chumi khua RBD hnenah chuan report tur a ni.

Nau piang anih pawhin hetiang tho hian report tur a ni

23. Damdawiin panpui laia thi te hi khawi hmuna report tur nge?

Chhanna : Damdawiin thlen hmaa thi, (brought dead) te register hi damdawiin mawhphurhna a nih loh avangin Damdawiin-in an lo register tur a ni lo va, a thihna hmun bialtu RBD hnenah report tur a ni.

24. Aizawl Municipal Corporation (AMC) hian Births & Deaths chungchang hi an khawih tho si a, Economics & Statistics Department hian an khawih baw si a, enge a awmzia?

Chhanna : AMC hi Directorate of Economics & Statistics hnuaiah Additional District Registrar of Births & Deaths niin Municipal area chung an enkawl a ni. Kum 2016 atangin AMC Office hian an thawk tan a, chuvangin AMC huam chung bik tan kum 2016 leh a hnu lama piang/thi te reng reng Birth/Death Certificate re-issue/ hming belh/paih/siamtha turin AMC office dawr tur a ni. Kum 2016 hma lama piang leh thi te erawh chu, AMC huamchhuang ami pawh ni se, an Certificate re-issue/hming belh/paih chungchangah Directorate of Economics & Statistics dawr tur a ni thung.